



## Rai Kilat Ilegal no Kilat Ilegal

Mahein Nia Lian Nú. 130, 28 Fevereiru 2018



*Foto: PNTL 2018*

**Fundasaun Mahein (FM)**  
**Website: [www.fundasaunmahein.org](http://www.fundasaunmahein.org)**

2018



## Kontiudu sira

Kontiudu sira	2
Introdusaun	3
Metodolojia	3
Kilat husi Krize 2006	4
Kilat ilegal	5
Asesu ba kilat iha Timor-Leste	7
Efeitu sira husi kilat no kilat ilegal	9
Rekomendasauun	11
Bibiliografia	12



## Introdusaun

Problema ho kilat iha Timor-Leste nafatin fanun ita hotu nia atensaun desde Krize 2006. Liu-liu kilat sira ne'ebé lakon durante Krize 2006 no kilat ilegal sira. Iha ona esforsu lubuk ida hodi rekolla no investigasaun ba kilat sira ne'ebé lakon durante krize.<sup>1</sup> Maibe kilat balu husi Polísia Nasional Timor-Leste (PNTL) nian seidauk rekolla hotu.<sup>2</sup> Iha tempu hanesan informasaun oin-oin husi autoridade sira seguransa nian hato'o katak kilat ilegal mos tama no espalla iha rai laran.<sup>3</sup>

Aleinde kilat sira ne'ebé lakon no kilat ilegal sira, kilat sira ne'ebé husi institusaun seguransa nian sai nafatin preokupasaun husi públiku tomak. Liu-liu kilat husi institusaun PNTL no FALINTIL-Força de Defesa Timor-Leste (F-FDTL) nia jestaun no utilizasaun. Iha ne'ebé kilat balu husi institusaun rua ne'e nian espalla iha media sosial monu ba ema sivil no labarik sira nia liman hanesan sasan halimar. Mesmu ne'e hanesan istilu ida husi ema ho kilat maibe fo mensajen katak kilat husi institusaun rua ne'e nia seidauk iha jestaun ba kilat ho diak.

Asuntu rai kilat ilegal no kilat ilegal Chefe Estado Maior General F-FDTL Major General General Lere Anan Timur liu husi media nasional responde katak lalika mehi atu halo funu iha Timor-Leste.<sup>4</sup> Maibe Fundasaun Mahein (FM) nia monitorizasaun nota katak vitima balu mate, kanek no estragus nu'udar efeitu husi kilat. Portantu efeitu husi kilat iha tinan hirak ikus ne'e hamate ema ida iha Bebonuk – Dili, hakanek ema ida iha Praia dos Coqueiros<sup>5</sup> no labarik ida iha Colmera – Dili,<sup>6</sup> no ida seluk tiru uma ida iha Manleuana – Dili iha tinan 2017.<sup>7</sup> To'o agora seidauk hatene kilat ne'e mai husi ne'ebé, karik kilat ilegal ka kilat sira husi pesoal seguransa sira nian seidauk hatene lolos.

Nune'e objetivu husi relatóriu ida ne'e sei deskreve kona-bá kilat sira lakon iha Krize 2006, kilat ilegal, asesu ba kilat iha Timor-Leste no efeitu sira husi kilat. Ikus liu ho rekomendasau sira ba Governu, liu-liu institusaun públiku sira ne'ebé hakna'ar-an ho kilat.

## Metodolojia

Fontes informasaun ba relatóriu ne'e mai husi fontes oin-oin hanesan dokumentu ofisial sira hanesan relatóriu investigasaun ba kilat iha tinan 2011, intervensaun sira

<sup>1</sup> Relatório Final Servisu Komisaun Investigasaun Armas F-FDTL ho PNTL. Minstériu Defeza no Siguransa, 2011.

<sup>2</sup> GMN TV, Ioron 17 Janeiru 2018. Disponivel iha ne'e: <http://gmnvtv.tl/id/justica-e-seguranca/2018/01/somotxo-laiha-kilat-ilegal-ih-a-sivil-nia-liman-%E2%96%A0-difisil-identifika-kilat-lakon/>

<sup>3</sup> GMN TV, Ioron 12 Novembru 2017. Disponivel iha ne'e: <https://www.youtube.com/watch?v=rafGsx7LHFE>

<sup>4</sup> GMN TV, Ioron 17 Janeiru 2018. Disponivel iha ne'e: <https://www.youtube.com/watch?v=3JQjOoNmKCo>

<sup>5</sup> Jornal Independente, Ioron 17 Maiu 2017

<sup>6</sup> GMN TV, Ioron 4 Janeiru 2018

<sup>7</sup> GMN TV, Ioron 2 Janeiru 2018



husi autoridade sira seguransa nian iha enkontru ofisial sira no relatório ka publikasaun husi media sira relasiona ho kilat sira lakon durante Krize 2006 no kilat ilegal sira. Nune'e hodi konklui relatório ne'e liu husi métodu ne'ebé Fundasaun Mahein (FM) adopta maka *Security Sector Discussion* (SSD). SSD hanesan diskusaun ne'ebé involve peskizador sira husi FM nian hodi diskute no análise ba materia sira ne'ebé relasiona ho relatório ne'e nian no hamosu rekomendasau sira.

### Kilat husi krize 2006

Desde relatório investigasaun ba kilat sira lakon iha Krize 2006 ne'ebé fo sai husi Ministériu Defeza no Seguransa iha tinan 2011, FM hato'o bebeik ona katak Governu presiza iha seriedade hodi implementa rekomendasau husi relatório investigasaun refere. Portantu kilat hirak ne'ebé lakon iha Krize 2006 relatório ne'e indika momos ona pesoal sira ne'ebé responsabiliza hodi rekopera hikas fali. Aleinde ne'e, relatório ne'e mos rekomenda loke prosesu hasoru pesoal sira ne'ebé indikadu iha rekomendasau relatório investigasaun ne'e nian maka loke prosesu disciplinar no kriminal.<sup>8</sup> To'o ohin loron Governu seidauk implementa rekomendasau husi relatório investigasaun ne'e.

Esforsu balu durante ne'e halo ona liu husi Rezolusaun Governu N.º 24/2014 loron 1 Setembru kona-bá Rekolla Armas, Munisoens, Explosivu sira no Fardamentu. Portantu rezolusaun ne'e estabelese periodu rekolla ba materiais hirak ne'e to'o loron 31 Outobru 2014 no Ministériu Defeza no Seguransa extende tan to'o loron 31 Dezembru 2014 katak sidadaun no entidade sira ne'ebé sei rai materiais hirak ne'e tenke entrega ba PNTL.

Felizmente kilat balu rekopera ona depois Krize 2006 no periodu sira ne'ebé estabelese iha rezolusaun governu nian ne'e no balu seidauk hatene ninia paradeiru lolos. Ministro Defeza no Seguransa José Agustinho Sequeira hatete kilat sanolu (10) husi PNTL nian ne'ebé lakon durante Krize 2006 seidauk rekolla fila-fali.<sup>9</sup> Nune'e iha fulan Dezembru 2017 Ministériu Defeza no Seguransa hasai sirkular ida husi loron 1 to'o 31 Dezembru 2017 la iha rezultadu ka la iha ema ruma maka entrega kilat ba PNTL no F-FDTL. Ministro Defeza no Seguransa José Agustinho Sequeira hato'o katak apelu sirkular la'o to'o ohin loron ita la haree ninia rezultadu ne'e signifika katak la iha kilat ilegal iha ema sivil nia liman.<sup>10</sup> Maibe informasaun seluk husi PNTL katak kilat hitu (7) maka sei lakon kompostu husi kilat boot tolu (3) no pistola Glock haat (4).<sup>11</sup>

<sup>8</sup> Relatório Final Servisu Komisaun Investigasaun Armas F-FDTL ho PNTL. Minstériu Defeza no Siguransa, 2011.

<sup>9</sup> GMN TV, loron 15 Dezembru 2017. Disponivel iha ne'e: <http://gmntv.tl/id/justica-e-seguranca/2017/12/kilat-pntl-10-resin-lakon-seidauk-hetan/>

<sup>10</sup> GMN TV, loron 17 Janeiru 2018. Disponivel iha ne'e: <http://gmntv.tl/id/justica-e-seguranca/2018/01/somotxo-laiha-kilat-ilegal-ih-a-sivil-nia-liman-%E2%96%A0-difisil-identifika-kilat-lakon/>

<sup>11</sup> GMN TV, loron 17 Janeiru 2018. Disponivel iha ne'e: <http://gmntv.tl/id/justica-e-seguranca/2018/01/somotxo-laiha-kilat-ilegal-ih-a-sivil-nia-liman-%E2%96%A0-difisil-identifika-kilat-lakon/>



PNTL rekuiñese katak esforsu operasional seluk liu husi servisu informasaun ka intelejensia sira hodi buka tuir kilat hirak ne'ebé lakon maibe susar atu identifika no la iha kolaborasaun diak husi komunidade sira hodi hato'o informasaun ba polísia. Ho ida ne'e PNTL husu komunidade sira presiza servisu hamutuk hodi fo informasaun kona-bá kilat ka pistola sira ne'ebé sei lakon.<sup>12</sup>

### Kilat ilegal

Chefe Estado Maior General F-FDTL Major General Lere Anan Timur hato'o ba media nasional katak kilat ilegal husi Atambua – Indonézia (Timor Osidental) tama ona iha Timor-Leste. Maske nune'e seidauk identifika lolos kilat hirak ne'e ninia paradeiru no liu husi media nasional husu atu sidadaun hotu-hotu kolabora no entrega ba autoridade seguransa sira PNTL no F-FDTL.<sup>13</sup>

Relasiona ho kilat ilegal ne'ebé tama husi fronteira, Komandante Unidade Patrullamentu Fronteira (UPF) – PNTL Superintendent Polísia João Belo hato'o katak informasaun balu ne'ebé UPF simu relasiona ho kilat ilegal sira ne'ebé tama husi Atambua-Indonézia maka kilat sira husi eis-milisia sira iha Atambua-Indonézia (Timor Osidental) maka fa'an fila fali mai Timor-Leste tamba nesesidade báziku sira nian.<sup>14</sup> Maibe la klaru kona-bá kilat ilegal sira ne'e nian paradeiru dadaun ne'e iha se nia liman.

Aleinde kilat automatiku sira (ilegal) husi Atambua-Indonézia, iha mos kilat seluk la'os automatiku ka bain-bain bolu “kilat manu nian” tama husi fronteira iha tinan 2017 ba kotuk. Kilat sira ne'e tama liu husi atividade negosiu ilegal iha fronteira entre sidadaun balu husi Timor-Leste no husi Atambua - Indonezia. Kilat balu ne'ebé FM identifika maka hanesan iha figura 01 kraik ne'e.

---

<sup>12</sup> GMN TV, Ioron 17 Janeiru 2018. Disponivel iha ne'e: <http://gmntv.tl/id/justica-e-seguranca/2018/01/somotxo-laiha-kilat-ilegal-ih-a-sivil-nia-liman-%E2%96%A0-difisil-identifika-kilat-lakon/>

<sup>13</sup> GMN TV, Ioron 12 Novemburu 2017. Disponivel iha ne'e:  
<https://www.youtube.com/watch?v=rafGsx7LHFE>


<sup>14</sup> Intervensaun Komandante UPF Superintendent Polísia João Belo iha enkontru kona-bá seguransa nasional ho Ministru Estadu Konselleru ba Seguransa Nasional no entidade sira ba asuntu seguransa nian iha Palacio Governo. Loron 20 Fevereiru 2018.

**Figura 01: Kilat la'os automatiku “kilat manu”**



Identifika mos katak kilat ne'e tama kompletu ho nia munisoes ho nia marka *DYNAMIT NOBEL TROIS DOR'T GERMANY BLACK SNIPER 4,5 mm 1,77 CALLIBER*. Kualidade husi munisoens ne'e nian maka número ida no rua no fa'an ho nia presu diferente mos (número ida nia presu US\$ 1.00 no número rua nia presu US\$ 1.50). Munisoens refere hanesan iha figura 02 kraik ne'e.

**Figura 02: Munisoens Dynamit Novel Trois Dor't Germany Black Sniper 4,5 mm 1,77 Caliber**



Kilat ne'ebé identifika iha leten ne'e espalla ona iha rai laran no FM nia monitorizasaun nota katak iha area rurais komunidade balu utiliza hodi ba kasa. FM preokupa katak ne'e potensia ka risku maka'as bainhira utiiliza sala no possibilidade bele utiliza hodi práтика krime. Kazu Taibesi – Dili iha tinan 2017 konfirma katak konforntu entre grupu rua no ema ida mate tamba hetan tiru ho kilat manu nian.<sup>15</sup>

---

<sup>15</sup> RTTL-ep, Iorон 4 Outobru 2017. Disponivel iha ne'e: <http://rttlep.tl/id/radio-news/2017/10/konfrontu-ih-a-mercado-taibesi-ema-ida-mate>

Nune'e mos kazu ne'ebé akontese iha Manufahe iha tinan 2016 membru sira husi F-FDTL prende kilat ida ho nia munisoens hamutuk tolu-nolu (30) husi sidadaun na'in tolu. Identifika katak kilat no munisoens refere hola husi rai liur no la'os husi PNTL ka F-FDTL nian.<sup>16</sup> Inklui kazu ne'ebé akontese iha Munisipiu Lautem veteranus Renan Selak prende kilat ka pistola ida iha Lautem iha loron 19 Juñu 2017 bainhira ema sivil ida ho motor lori ameasa ema seluk iha manu-futu fatin no entrega ba PNTL. Identifika katak pistola ne'e husi UNPOL nian ne'ebé lakon iha tinan 2003.<sup>17</sup>

Ikus liu kontendor rua ne'ebé Polísia Sientifica Investigasaun Kriminal (PSIK) prende kontendor rua iha Portu Dili iha loron 26 Fevereiru 2018 no materia prima ne'ebé kontein iha kontendor rua ne'e nia laran ho tipu *Ammonium Nitrate Phosphate* hamutuk tonelada lima-nolu (50) importa husi Xina. Tamba deskonfia hanesan materia prima hodi produs bomba. Tuir Komandante Unidade Espesial Polísia (UEP) – PNTL Superintendente Xefe Polísia Afonso dos Santos katak hanesan elementu ida sensetivu no perigu bainhira kombina ho produtu seluk bele sai hanesan bomba. Kazu ne'e dadaun ne'e iha hela prosesu investigasaun nia laran. Suspeitu ba kazu ne'e Timor-oan na'in rua, ida seluk husi Indonézia no jestor ba empreza ne'ebé importa materia hirak ne'e.<sup>18</sup>

### **Asesu ba kilat iha Timor-Leste**

FM nia monitorizasaun iha media sosial nota katak iha fotografia oin-oin ne'ebé espalla tantu husi membru balu institusaun F-FDTL no PNTL nian kona-bá kilat ne'ebé utiliza husi ema ne'ebé la'os membru husi institusaun rua ne'e nian. Mesmu iha fotografia sira ne'ebé espalla iha media sosial hanesan istilu ida husi ema ho kilat. Maibe FM preokupa oinsa bele asesu ba kilat? Karik ne'e hanesan sasan halimar nian?

**Figura 03: Labarik ida kaer kilat ida husi F-FDTL nian**



<sup>16</sup> Hallo Online, loron 4 Outobru 2016. Disponivel iha ne'e: <http://hallo.tl/kilat-prende-ihamaufahi-hola-husi-rai-liur/>

<sup>17</sup> Tatoli: Agencia Noticosa de Timor-Leste, loron 22 Juñu 2017. Disponivel iha ne'e: <http://www.tatoli.tl/2017/06/pistola-ida-dezarma-ihalospalos-forsa-nepal-nian/>

<sup>18</sup> GMN TV, loron 27 Fevereiru 2018. Disponivel iha ne'e: <https://www.youtube.com/watch?v=pwZXvLU52hQ>

Bainhira fotografia iha leten ne'e espalla iha media sosial lamentasaun barak husi públiku inklui eis-Sekretariu Estadu Defeza Dr. Julio Tomas Pinto liu husi nia pajina Facebook hato'o katak:

"Kilat ne'e ho naran M4 kilat jerasaun foun husi M16 husi Estadu Unidus Amerika (EUA). Portantu atu sosa kilat ne'e desde 2009 – 2012 Sekretaria Estadu Defeza ho F-FDTL halo lobi maka's ho Embasada EUA nian no prepara fasilitade hanesan payol no kapasidade jestaun ba armas. Tamba tempu ne'eba sira dehan Timor-Leste seidauk iha payol no la iha kapasidade jestaun ba armas. Maibe ikus mai hetan duni autorizaun sosa armas M4 husi Amerika no Malazia no sira dehan ita prenxe ona kriteria. Tamba desde 2006, Timor-Leste tama lista negra ba ekipamentu militar EUA nian. Mas saida maka akontese agora? Imi bele haree iha fotografia ne'e. Atan hau triste tebes ho hahalok la profesional ida ne'e. Fiar katak wainhira EUA hatene hahalok hanesan iha fotografia ne'e, maka sira sei la autoriza tan ita atu sosa armas husi EUA.

Preokupasaun sira nune'e hanesan eis-Sekretariu Estadu Defeza pertenente tebes no la'os deit ba F-FDTL maibe mos ba PNTL atu halo jestaun diak ba kilat sira ne'ebé institusaun rua ne'e iha. Portantu atu sosa ekipamentu militar nian hanesan kilat la'os buat fasil no tenke prenxe rekezitu oin-oin, liu-liu jestaun ba kilat. Katak kilat sira ne'ebé institusaun F-FDTL no PNTL nian la'os utiliza arbitru mesmu iha fotografia ne'e hanesan istilu ida ho kilat maibe preojudika ba ita nia estadu.

FM mos haree sidadaun civil balu istilu ho kilat espalla mos iha media sosial hanesan Facebook. FM lahatene kilat hirak ne'e asesu iha ne'ebé, dalaruma iha rai liur ka iha rai laran maibe preokupasaun boot ida ba ita hotu oinsa bele asesu?

**Figura 04: Ema na'in rua ho kilat boot**





Iha âmbitu ida ne'e kilat la'os sasan hodi halimar, FM fo sai ida ne'e wainhira kilat iha ema sivil nia liman liu-liu iha labarik ki'ik sira ne'e dezastre boot bele hakbesik. Asidenti bele akontese. Kaer no utuliza kilat persiza iha treinamentu no fo biban ba labarik ki'ik sira halimar ho kilat bele hetan konsekuensia trajiku. Iha sorin ida, hatudu kilat ba ita nia labarik sira no rai iha uma, ne'e risku no iha situasaun ida ne'ebé dala ruma labarik sira buka hatene no koko hodi halimar no laiha kontrola ka monitorizasaun. FM dala ida tan bolu atensaun atu halo kontrolu diak ba kilat husi membru PNTL ho F-FDTL. FM mos husu atu komandu sira foti desizaun seriu no kastigu ba membru sira ne'ebé hetan kapturasaun fo impresta kilat ka sira nia uniforme ba ema sivil sira.

### **Efeitu sira husi kilat no kilat ilegal**

Iha loron 6 Maiu 2017 joven ida mate tamba hetan tiru no deskonfia husi membru PNTL sira ne'ebé halo atuasaun iha konfrontu entre grupu rua iha Bebonuk – Dili. Maske joven ne'e mate iha atuasaun PNTL nian no investigasaun ba kazu ne'e la'o tiha ona maibe to'o agora seidauk identifika lolos kilat no suspeitu lolos ba kazu ne'e nian.

Iha loron 12 Maiu 2017 ema deskuiñesidu ho kareta tiru kanek joven ida iha Praia dos Coqueiros – Dili. To'o agora seidauk identifika lolos kilat ne'e husi ne'ebé no suspeitu ba kazu ne'e. Mesmu altura ne'eba deskonfia katak kilat husi PNTL nian tamba tiru mai husi kareta ida la iha xapa matrikula maibe iha nia lolon hakerek sigla Companha Seguransa Pessoal (CSP) – PNTL nian.<sup>19</sup>

Monitorizasaun FM nian rejista iha tinan 2017 akontese ema deskuiñesidu ho kilat tiru uma ida iha Manleuana - Dili iha 31 Dezembru 2017.<sup>20</sup> Kazu hanesan akontese iha Colmera – Dili husi ema deskuiñesidu tiru kanek labarik ida iha Dezembru 2017.<sup>21</sup> Husi kazu rua ne'e susar identifika kilat husi ne'ebé. Kazu ida seluk ne'ebé akontese iha Merkadu Taibesi iha tinan 2017 entre grupu rua no husi akontesementu ne'e rezulta ema ida mate tamba tiru husi grupu seluk ho kilat manu nian.<sup>22</sup>

Insidente seluk iha Suku Casa Munisipiu Ainaro bainhira mosu konfrontasaun entre grupu rua no atuasaun PNTL nian iha fatin akontesementu tiru hodi hakalma situasaun ne'e. Nune'e ema ida trauma ho membru PNTL sira nia tiru desmaia no mate iha insidente ne'e iha fulan Novembru 2017.<sup>23</sup>

Nune'e mos atuasaun husi PNTL nian, joven ida hetan tiru iha parte ain husi Unidade Espesial Polisia (UEP) – PNTL bainhira halo atuasaun hasoru grupu ne'ebé

<sup>19</sup> Jornal Independente, loron 17 Maiu 2017.

<sup>20</sup> GMN TV, loron 2 Janeiru 2018

<sup>21</sup> GMN TV, loron 4 Janeiru 2018.

<sup>22</sup> RTTL-ep, loron 4 Outobru 2017. Disponivel iha ne'e: <http://rttlep.tl/id/radio-news/2017/10/konfrontu-ih-a-mercado-taibesi-ema-ida-mate>

<sup>23</sup> GMN TV, loron 7 Novembru 2017. Disponivel iha ne'e: <http://gmntv.tl/id/justica-e-seguranca/2017/11/memburu-pntl-tiru-arbiru-hamate-komunidade-ida-ih-a-ainaro/>



involve iha konfrontasaun iha Fatuhada – Dili iha Novembru 2017.<sup>24</sup> Kazu seluk husi kilat PNTL nian akontese iha Munisipiu Ainaro membru PNTL ida tiru kanek membru ida husi F-FDTL iha loron 26 Agustu 2016.<sup>25</sup> Inklui ema ida mate iha Covalima tamba hetan tiru husi membru UPF ida bainhira halo atuasaun hasoru vitima ne'e iha loron 3 Agustu 2016.<sup>26</sup> Ikus liu kazu seluk ne'ebé akontese iha Munisipiu Lautem no Rejiaun Administrativa Oe-cusse membru F-FDTL tiru ameasa membru PNTL iha tinan 2016 ba kotuk.<sup>27</sup>

**Tabela 01: Vitima sira husi kilat iha tinan 2017**

Nú.	Impaktu	Fatin	Tinan	Total
1.	Mate	Bebonuk – Dili	2017	1
2.	Mate	Taibesi – Dili	2017	1
3.	Mate	Casa – Ainaro	2017	1
4.	Mate	Covalima	2016	1
5.	Kanek	Praia dos Coqueiros – Dili	2017	1
6.	Kanek	Colmera – Dili	2017	1
7.	Kanek	Fauhada – Dili	2017	1
8.	Tiru kuak uma ida	Manleuana – Dili	2017	1
9.	Kasa animal fuik	Manufahe	2017	1
10.	Ameasa ho kilat	Lautem	2016	1
11.	Ameasa ho kilat	Oe-cusse	2016	1
<b>Total</b>				<b>11</b>

**Fontes:** Rezultadu Peskiza Fundasaun Mahein tinan 2017-2018

Nune'e mos efeitu husi utiliza sala no kilat ilegal sira hasoru animal protezidu sira iha rai laran. Informasaun oin-oin FM simu husi komunidade sira iha Viqueque, Manufahe no Manatuto iha grupu balu ho kareta kasa animal fuik sira hanesan rusa no karau. Grupu hirak ne'e susar identifika maibe utiliza kilat hodi kasa.

Kazu ida akontese iha fulan Agustu 2017, komunidade sira kaptura sidadaun na'in lima (5) depois entrega ba PNTL Munisipiu Manufahe tamba utiliza kilat ka arma kalibre doze no kilat manu hamutuk lima hodi kasa animal fuik no prende mos kareta tolu (3) no rusa ida ne'ebé konsege tiru mate durante kasa animal fuik.<sup>28</sup>

<sup>24</sup> GMN TV, loron 21 Novembru 2017

<sup>25</sup> Komunikadu Imprensa PNTL no F-FDTL iha loron 27 Agustu 2016. Disponivel iha ne'e: <https://www.pntl.tl/konferensia-imprensa-komandante-jeral-polisia-nasional-timor-leste-pntl-relasiona-ho-kazu-neebe-involve-oknum-pntl-ho-f-fdtl/>

<sup>26</sup> Komunikadu Imprensa Fundasaun Mahein, loron 8 Agustu 2016.

<sup>27</sup> Timor Agora sita husi Tatoli: Agencia Noticiosa de Timor-Leste, iha loron 9 Novembru 2016. Disponivel iha ne'e: <https://timoragora.blogspot.com/2016/11/lere-kondena-oknum-f-fdtl-ameasa-membu.html?m=1>

<sup>28</sup> RTTL-ep, loron 21 Agustu 2017. Disponivel iha ne'e: <http://rttlep.tl/radio-news/2017/08/polisia-kaptura-ema-sivil-lori-kilat>



## **Rekomendasaun**

1. Rekomeda ba PNTL no F-FDTL liu husi servisu informasaun sira kontinua buka tuir kilat hirak ne'ebé sei lakon durante Krize 2006 no kilat ilegal sira ne'ebé espalla iha rai laran.
2. Hadi'a mekanismu interna institusaun PNTL no F-FDTL nian kona-bá jestaun ba kilat no nia utilizasaun.
3. Institusaun PNTL no F-FDTL presiza foti medida ida ne'ebé rigor ba membru sira ne'ebé utiliza kilat la tuir nesesidade no prosedementu uzu kilat nian.



## Bibliografia

GMN TV, Iorón 27 Fevereiru 2018. Disponivel iha ne'e: <https://www.youtube.com/watch?v=pwZXvLU52hQ>

GMN TV, Iorón 17 Janeiru 2018. Disponivel iha ne'e: <http://gmntv.tl/id/justica-e-seguranca/2018/01/somotxo-laiha-kilat-ilégal-ihá-sivil-nia-liman-%E2%96%A0-difisil-identifika-kilat-lakon/>

GMN TV, Iorón 15 Dezembru 2017. Disponivel iha ne'e: <http://gmntv.tl/id/justica-e-seguranca/2017/12/kilat-pntl-10-resin-lakon-seidauk-hetan/>

GMN TV, Iorón 7 Novembru 2017. Disponivel iha ne'e: <http://gmntv.tl/id/justica-e-seguranca/2017/11/membru-pntl-tiru-arbiru-hamate-komunidade-ida-ihá-ainaro/>

GMN TV, Iorón 12 Novembru 2017. Disponivel iha ne'e: <https://www.youtube.com/watch?v=rafGsx7LHFE>

Haloo Online, Iorón 4 Outobru 2016. Disponivel iha ne'e: <http://haloo.tl/kilat-prende-ihá-manufahi-hola-husi-rai-liur/>

Intervensaun Komandante UPF Superintendente Polísia João Belo iha enkontru kona-bá seguransa nasional ho Ministru Estadu Konselleru ba Seguransa Nasional no entidade sira ba asuntu seguransa nian iha Palacio Governo. Loron 20 Fevereiru 2018.

Jornal Independente, Iorón 17 Maiu 2017.

Komunikadu Imprensa PNTL no F-FDTL iha Iorón 27 Agustu 2016. Disponivel iha ne'e: <https://www.pntl.tl/konferensia-imprensa-komandante-jeral-polisia-nasional-timor-leste-pntl-relaciona-ho-kazu-neebe-involve-oknum-pntl-ho-fdtl/>

Relatóriu Final Servisu Komisaun Investigasaun Armas F-FDTL ho PNTL. Minstériu Defeza no Siguransa, 2011.

Rezolusaun Governu N.º 24/2014, Iorón 1 Setembru kona-bá Rekolla Armas, Munisoens, Explosivu sira no Fardamentu.

RTTL-ep, Iorón 4 Outobru 2017. Disponivel iha ne'e: <http://rttlep.tl/id/radio-news/2017/10/konfrontu-ihá-mercado-taibesi-ema-ida-mate>

RTTL-ep, Iorón 21 Agustu 2017. Disponivel iha ne'e: <http://rttlep.tl/id/radio-news/2017/08/polisia-kaptura-ema-sivil-lori-kilat>

Tatoli: Agencia Noticiosa de Timor-Leste, Iorón 22 Juñu 2017. Disponivel iha ne'e: <http://www.tatoli.tl/2017/06/pistola-ida-dezarma-ihá-lospalos-forsa-nepal-nian/>

Tatoli: Agencia Noticiosa de Timor-Leste sita husi Timor Agora Online, iha Iorón 9 Novembru 2016. Disponivel iha ne'e: <https://timoragora.blogspot.com/2016/11/lere-kondena-oknum-f-fdtl-ameasa-memburu.html?m=1>